


ル 5
326
18



門
號
卷

名山巖洞泉石古蹟卷之十三

名山巖洞泉石古蹟卷之十三

吳興歸安山泉慎蒙編選

校正

陝西

西安府

終南山 乃關中南山西起隴鳳東踰商洛綿亘千

里有餘其南北亦然隨地異名總言之則曰南山耳

太乙山 按五經要義終南一名太乙太乙者猶曰

天下第一山也三秦記曰太乙山一名地肺皇甫謐

高士傳曰秦四皓隱地肺山即此王維題終南詩○

名山已

卷之十三

一

二百九

太乙近天都連山到海隅

樊川 三秦記曰長安正南秦嶺根水北流為秦川
一名樊川漢高祖至櫟陽以將軍樊噲灌廢丘功賜
食邑于此故曰樊川

神禾原 在鎬水東潏水西首起南山麓西至東交
河而止劇談錄曰晉天福六年原產禾一穗重六斤
故名

龍首山 一名龍首原長六七十里蓋山言其高峻
原言其高平其實一耳原起伏蟠曲貫秦漢隋都唐
三內其西北高處則為秦長樂漢未央稍東南城六

坡則為隋城唐西內擬乾六爻之地其東則為唐南
內興慶龍池之所其北則為唐東內大明宮含元宣
政紫宸蓬萊金鑾諸殿之所南內之東南引漕水入
城則為龍首渠入東苑則為龍首池龍首殿皆以是
原得名原之所經在今城東南則為狗脊嶺東北則
為長樂坡東內前今北闕外為龍首坡俗名三稜坡
金鑾殿所則為金鑾坡其在南內興慶池西玄宗藩
邸所者為開元坡其在宣平坊者為胭脂坡在下馬
陵下者為翡翠坡二坡皆舊妓館所也

臨潼縣

名山記 卷之三十三
金沙洞 在長生殿南三里按驪山東西長數十里其陽為藍田北山其陰足為溫泉其上為石魚巖有老君殿又東南為走馬嶺其東為東繡嶺為石瓮谷為鳳凰原為金斧山為新豐原為浮腫山皆驪山東麓其西為西繡嶺其山畔有峯其坪為驪山觀老母殿唐高祖幸溫泉於觀側見白鹿遂名曰白鹿
鴻門坂 在縣東十七里漢舊大道北下坂口名也關中記曰鴻門在始皇陵北十里即沛公會項處也漢文帝指新豐路示慎夫人曰此是北走邯鄲道也又亭尉呵李廣處

興平縣

馬嵬坡 在縣西二十五里即楊妃自經葬處今有塚存杜佺詩曰○楊柳依依水拍堤春晴菲屋燕爭泥海棠正好東風惡狼籍殘紅襯馬蹄後僖宗幸蜀迴過此人有詩曰○馬嵬楊柳綠依依又見鑿輿幸蜀歸泉下阿環應有語這迴休更罪楊妃

藍田縣

秦嶺 縣東南詳見府誌入商洛漢中者必越嶺而後達遇雪則阻故韓文公至是困焉侍郎李遜學詩曰○河嶽英靈萃此身力恢吾道歷荆榛廟高秦嶺

餘千載名重唐朝第一人。
七盤山 在縣南十里通典云七盤十二絳藍關之險路也舊道自藍谷入商唐貞元初刺史李西華始開此道行旅便之。

商州

商山 在州東南九十里一名楚山一名商洛山漢四皓隱此後人名其隱處為知亭山嘗作歌曰漠漠高山深谷逶迤曄曄紫芝可以療飢唐虞世遠吾將安歸駟馬高蓋其憂甚大富貴之留人不如貧賤之肆志乃共入商洛山以待天下之定韋蟾贈商山僧

詩曰○商嶺東西路欲分兩間茅屋一溪雲師言耳重知師意人非不欲聞。

澄城縣

洗腸泉 在縣西三里甘泉南百步許俗傳晉高僧弗圖澄洗腸於此故名

韓城縣

龍門山 在縣東北八十里禹貢導河至龍門呂氏春秋曰龍門未開河出孟門東大溢是謂洪水禹鑿龍門始南流愚按河水至此自山直下千仞濺沫如雨濤聲如雷地皆震撼其下端瀾驚波如山如沸兩

崖皆斷山絕壁相對如門唯神龍可越故曰龍門傳
記曰河魚至此非化龍而飛騰霄漢者莫能逆流而
上三秦記謂大魚至是不能化龍者有暴腮之困謂
此

錯開河口山 此山在龍門山北其河口略似龍門
而未通蓋鯀治水時所鑿九載績用弗成者也今跡
存名錯開河口

平陰縣

太華山 在縣南十里即西嶽以西有少華山故此
曰太華山李白詩○石作蓮華雲作臺今觀山形外

羅諸山如蓮瓣中三峯特出如蓮心其下爲雲臺山
自遠視之宛然青色蓮華開于雲臺之上疑山所由
名白詩得之是山高五千仞片石壁立如削成有芙
蓉明星玉女三峰上有○八卦池○太乙池○白蓮
池○細辛坪○五粒松○玉女洗頭盆○老君洞○
仙碁臺菖蒲池○蘆葦池○二十八宿池及○蒼龍
嶺○日月崖○仙掌巖石月之勝又有洞號曰洞天
山海經云華山有蛇名蝮蠃六足四翼見則天下大
旱宋寇準八歲華山詩云○只有天在上更無山與
齊舉頭紅日近迴首白雲低

石羊城 在張超谷之西乃黃初平叱石化羊之處
與兄初起俱仙隱于此又名仙谷

落鴈峰 在華山唐李白登之曰此山最高呼吸之
氣想通帝座矣恨不携謝朓驚人詩來以問青天耳
毛女峯 在嶽之西昔秦始皇宮人因秦亡入此山
服松葉飲泉體生綠毛故名毛女山

雲臺峰 在嶽東北兩峰崢嶸四面陡絕上冠景雲
下通地脉巖然獨秀有若雲臺周武帝時有道士焦
道廣居此峰辟粒飡霞帝親詣山庭問道因而谷口
置雲臺觀

焦公巖 在嶽東南真人焦孝龍隱此常飡白石後
遭野火燒其庵真人危坐火中火息徐徐而起又于
雪中單衾而卧顏色赤然如盛夏之狀

王刁三洞 在嶽東仙人王暹與友人刁自然俱于
此登仙故以名洞洞有三上洞人莫能到中洞有飛
石渡洞門下洞隱居者多在其中

石仙洞 在嶽北而半腹中其深不可測時出異色
雲氣洞口有丹青石似仙人之狀故以名洞上有瀑
布飛流直下三千餘丈又名水簾洞

陳希夷庵 希夷名搏字圖南號扶搖先生唐長興

中舉進士不第因肆意山水後之華山雲臺觀古基
開荆榛而居之名曰希夷菴菴前有睡洞傍有無憂
樹後柴世宗詔見拜諫議大夫不受賜號白雲先生
宋太宗詔見延英以賓禮禮之賜號希夷先生端拱
初命弟子于蓮花峯下鑿石室于張超谷中而化形
焉

壺公石室 在嶽之西北孤峰上可容十餘人費長
房從壺公學道之所東谷中即後魏道士寇謙之筭
場西谷中即修羊公石榻穿陷之所

長春石室 在雲臺山側唐貞觀中道士杜懷謙居

之

車箱潭 在仙谷宋仁宗每歲遣使投金龍玉簡徽
宗封爲豐潤侯水府記曰天下一十八處水府華山
車箱潭乃第七水府也

渭南縣

倒獸山 一名玄象山在縣東南二十七里十六國
春秋曰西晉王嘉隱於東陽谷鑿崖穴而居弟子傳
業者數百人亦皆穴處石季龍兵亂其徒衆至於長
安潛隱終南山結庵而止門人聞而復隨之乃遷於

倒獸山

武功縣

武功山 在縣南一百里北連太白山最秀傑縣以此得名杜甫○遙瞻太白雪喜近武功天

三水縣

黑石巖 在縣東五十里石門山之西其山石色似漆壁立萬仞

同官縣

哭泉 在縣北四十里與宜君界相接處姜女送寒衣至長城負其夫骨至此道渴哭之其泉湧出至今有似哭聲提學副使伍福有詩

鳳翔府

虎跑泉 在城東北一十五里大像寺按金佛寺石刻云元祐中東坡過鳳翔游大像寺詩○金沙泉湧雪濤香酒作醍醐大地涼倒浸九天河影白遙通百谷海聲長僧來汲月歸靈石人到尋源宿上方欲續茶經校奇品山瓢留待羽仙嘗

郿縣

太白山 在城東南四十里鍾西方金宿之秀關中諸山莫高于此其山巔高寒不生草木上有鐵鑄山神牌三曰大阿福二阿福三阿福有湫池雖三伏亦

名山記
卷之三
疑冰蓋山巔常有積雪不消盛夏視之猶爛然故以太白名關中遇旱則登山取湫然山既高寒冰雪常凝身弱衣薄登山者多死俗傳以為太白神能留人非也麓有鬼谷即鬼谷子授蘇秦押闔術處
五丈原 在城西二十里斜峪口即漢諸葛亮駐師伐魏處元鄒弘道詩○南陽尚憶起龍蟠五丈星流太將壇人仰漢儀應載觀天教王業只偏安圖分八陣遺沙石表歷千秋見肺肝最是劔門旋旆日不知仲達膽猶寒

達摩洞 在太白山下其石破之有松栢形色俗傳

達摩和尚傳神光法處

寶鷄縣

石鼓山 在城東二十里山麓舊有石如鼓者十上有石鼓文相傳為周宣王田獵講武時石蓋古無碑刻凡文字勒諸器物而已武事以鼓進兵故勒文用鼓詳見古跡

麟游縣

玉女潭 在城西南十五里俗傳唐武后避暑九成宮時浴處

褒城縣

斜谷 在縣西北舊有棧閣二千九百八十九間板閣二千八百九十二間土人云其間有一溪可行舟襃谷 在縣東北十里出連雲棧直抵鳳縣斜谷七百里郡國志云北口曰斜南口曰襃長四百七十里同為一谷兩谷高峻中間谷道襃水所流昔張良說高祖燒絕所過棧道曹操出斜谷遮要以臨漢中諸葛亮由斜谷取郿皆此道也。

連雲棧 洪武二十五年欽遣普定侯監督軍夫增損歷代舊路開通修建鷄頭棧八十五間大小石洞棧即今鷄頭關北橋棧三間石嘴七盤棧即今七盤

棧閣九十二間又河底七盤下橋棧一十五間獨架橋一百四十二間。

洋縣

子午谷 在縣東北六十里舊子午谷道在金州安康縣界梁將軍王神念以緣山避水橋梁多壞乃別開子午道即此蜀魏延請從襃中出秦嶺當子午而北不十日可到長安又張郃由子午攻漢中晉桓溫命涼州刺史司馬勳出子午道又楊貴妃嗜生荔枝詔驛自涪陵達州入子午谷至長安杜甫詩○百馬死山谷至今耆舊悲。

質簞谷

在縣西北五里舊志文與可作亭谷中蘇

子瞻寄詩

○漢川脩竹賤如蓬斤斧何曾赦籜龍是

日與可同妻游谷中燒筍晚食發函得詩失笑噴飯

滿案

茶藤洞

在舊郡圃東坡詩○長憶故山寒食夜野

茶藤發暗香來

冰池

在舊郡圃東坡詩○不嫌冰雪遶池看誰似

詩人巧耐寒記取羲之洗硯處碧琉璃下黑蛟蟠

寧羗州

聖水崖

在州南三十里崖畔懸一石如龍頭滴水

崖下過客飲而甘之故名

嘉魚洞

在州南七十里西流河崖畔秋冬水涸則

魚藏春夏水漲則魚出味美似鱗詩所謂南有嘉魚

傳謂出自河南之內穴即此

七星洞

在州北一百里崖畔有七孔如星

金牛峽

在州北五十里一名五丁峽秦惠王謀伐

蜀患山隘險乃作五石牛每旦置金于牛尾下詭言

能糞金欲以遺蜀王王負力而貪乃令五丁力士開

道引之秦因使張儀司馬錯引兵滅蜀宋胡曾○山

嶺千重擁蜀門成都別是一乾坤五丁不鑿金牛路

秦惠何由得并吞

滴水巖 在縣南六十里官道傍兩山峭拔其中有

飛瀑自石下至山根

龍門洞 在縣西北百八十里舊大安軍有水自洞

中流出冬夏不竭宋趙清獻公詩云○蜀道群山盡

可名更逢佳處愈神清初疑谷口連雲掩入見天心

蒲洞明怪石磷磷蹲虎豹飛泉落落碎瑤瓊巖別

有神仙路又得攀躋向上行

三泉 在舊大安軍東門外瀕江蒼石上有三泉如

小車輪如古盤盎品列鼎峙

畧陽縣

玉女山 在縣東南三十里山高千仞多雲霞映之

不見其巔山半有白石如人冠冕坐於崖間前有白

石數層如人侍立狀

羅漢洞 一在縣南七十里嘉陵江上靈岩寺南深

十餘丈濶數尋後有邃穴深不可測中有石柱承載

巖崖其左有藥水岩一在城北百四十里深數丈濶

五尋洞前有大石由傍入

金州

青碌洞山 在州西四十五里有古石洞二十處

心山 在州西北五里詳見牛山記

黃巢谷 在牛山詳見牛山記

洵陽縣

神仙洞 在縣西南一百五里內有生成石蓮花一

十九朶石獅子一洞門鐫紫蓋神仙洞天六字

紫陽縣

望夫石 在縣西南八里耆翼傳謂一婦以夫從戎

朝夕登望後化為石李素詩○望夫化石立山根何

事人間處處存漢廣汝墳風化遠乾坤留此魏狐奔

鴛鴦石 在縣西五里漢江濱有雌雄之狀舊在洋

縣鴛鴦壩順流止此漁人識之

平涼府

崆峒山 在府西四十里上有問道宮黃帝問道于

廣成子蓋在此山又山有玄鶴洞廣成洞游師雄詩

云○崆峒一何高崛起乾坤闢峻極倚杳冥崢嶸巨

今昔勢將玉繩齊位據金野窄

香爐峰 在崆峒山一名香爐臺游師雄詩○仰陞

香爐臺俯瞰倒插石註云自香爐臺望倒插石上巨

下銳尤為奇惟

華亭縣

見子巖 在縣東四十里世傳人失其子數載至此
偶得見之因名巖內有大石佛像三小石佛像一十
九

金佛硤 在縣西北百八十里上有金粧石佛像三
在石崖內峽長二十里峭壁對峙不見天日當河西
孔道

鞏昌府 西和縣

祁山 在城北七里有城極險峻開山圖云漢陽
郡西南有祁山乃九州之名阻天下之奇峻蜀志云
諸葛亮率諸軍伐魏攻祁山以木牛流馬運餉即此

仇池山 在城南一百里林木繁茂四面壁立峭絕
險固自然有樓櫓却敵狀上有平地方二十餘里有
豐水泉如湖可煮鹽自下而上有羊腸盤道三十六
迴即晉楊難當所據處杜甫詩○萬古仇池穴潛通
小有天

通靈山 在縣西一百四十里四山環合二水榮流
有清水泉自岩竇飛落如玉繩亦勝境也

龍洞 在縣西洞口可容十餘人洞有字直下三十
丈觀者縋而上下中有水不涸

雕窠谷 在州南麥積山之北有隗囂避暑宮故基

對面有瀑布瀉蒼崖間亦勝境也

鐵堂峽 在州天水廢縣東五里峽有石筍青翠長者至大小者可為礪蜀漢姜維居此峽有鐵堂莊四山環抱對面有孤塚相傳維祖塋也

馬跑泉 在州東四十里唐尉遲敬德與番將金牙戰士卒罷渴無水敬德馬忽跑出泉三軍飲足

銀椿崖 在州東北五十里壁立萬仞崖畔石柱如銀色光映日傍有洞穴求莫得入

仇池石 出仇池山宋蘇東坡得之以為希代之寶有詩

兩當縣

鷲鷲山 在縣東十五里一統志古鳳州取名此山腰有登真洞傍有列宿峰石鏡峰朝陽亭碧桃軒集休觀下有分水溪

登真洞 在鷲鷲山唐張果老登真之所洞高一丈深百尺有水自頂注于石池中傍有石振之有聲俗呼為石鼓洞石有真武閣閣東攀石而上為朝陽亭亭有石刻棋盤對奕坐榻又東為碧桃軒洞門刻古今名賢詩刻

階州

五仙洞 在州東二十里白水江之南山半有洞穴
深百餘里中有黃盧木橋又有鐵橋橋下皆有流水
如珮環之聲渡鐵橋數里有大風不可入微聞有鷄
犬聲不知何境界也入洞者多携燭及松脂火日晨
入及出洞則昏暮矣洞中仙蹟甚多中有卧龍坪寬
廣容數十人或云神仙栖止之地

臨洮府 蘭州

臯蘭山 在州南五里州之望山也高峻渾厚左右
蜿蜒如張兩掖東西環拱州城延袤二十五里隋置
州取此為名山下地勢平夷可耕可守漢霍去病擊

匈奴鏖戰臯蘭山下即此地因謂是山為關塞云明
肅莊王詩○金城關上望臯蘭嶺勢根盤復遶環

渭源縣

烏鼠同穴山 又名青雀山在縣西二十里其烏名
餘其鼠名騷禹貢導渭自烏鼠是也

慶陽府 真寧縣

要冊靈湫 在縣東六十里顯聖廟後周一百八十
步禽魚不游萍藻不生水澄碧綠旱則不乾澇則不
溢遠

延安府

牡丹山 在府南四十里許有山曰花原頭一名牡丹山多牡丹故名樵者以牡丹為薪知府李延壽游牡丹山詩○一株豪屋人爭賞寧似延安花滿山遠近隨風香馥郁高低迎目錦爛斑

延長縣

錦屏山 在縣南一里屹然高聳四時花木蒼翠及構寺廟樓閣青紅望之如錦屏然故名

玉蓮池 在縣境池有萬頃為一方之勝

邠州

石空洞 在州西南百一十里有石洞深一丈五尺

內鑿萬佛石像世傳以為魯班所鑿

綏德州

䟽屬山 在州境內山海經式負之臣曰危與式負殺窳窳帝乃桎之䟽屬山極其右足反縛兩手與髮繫之山上木在開題西北漢宣帝使人發上郡䟽屬山於盤石室中得一人徒裸被髮反縛械一足因問群臣莫能曉劉向按此言對之宣帝驚異始重文學嗚咽泉 在州南三里即秦太子扶蘇自縊處事見陵墓唐胡曾詩○舉國賢良盡淚垂扶蘇屈死戍邊時至今谷口泉嗚咽猶似當年恨李斯

寧夏衛

賀蘭山 在城西六十里盤踞數百里倚以為固唐韋瞻詩○賀蘭山下果園成寨北江南舊有名

岷州衛

摩雲嶺 在衛西南去宕昌寨三十里涇野子有岷州曲○一江白浪摩雲嶺萬樹青松間井河常子枕眠高卧處月明人唱定羌歌

魯班崖 在衛南三百里兩崖懸絕有二靈柯插入巖隙間俗傳魯班鑿山引臨江水入白水江以去壅塞之患

甘州衛

馬蹄山 在都司城南一百里山巖石間有神驥足在焉又有臨松青松丹峽三名

肅州衛

崑崙山 在衛西南二百五十里南與甘州山連其巔峻極經夏積雪不消世呼雪山

天生橋 在衛東北三十里水從地下流人從地上行宛然如橋不假人力為之故名

鎮番衛

蘇武山 在衛東南二十里俗傳漢蘇武牧羝處舊

有蘇武廟

山丹衛

焉支山 在衛東南五十里一名山丹山漢霍去病將萬騎涉狐奴水過焉支山即此後漢匈奴失此山歌○失我焉支山使我婦人無顏色

沙州衛

三危山 州之望山在東南三峰聳出雲表故曰三危即舜竄三苗之地禹貢三危既宅

玉門關 漢列河西郡通道玉門障塞出長城外數千里是也漢班超在西域上書願生入玉門關即此

渥洼水 漢武帝得天馬于此水

塞外

天山 伊吾郡有天山高十五里廣六十里冬夏積雪不消一名雪山匈奴過之皆下馬拜漢遣二師將軍李廣利將二萬騎出酒泉擊右賢王於天山得虜萬騎而還即此

葱嶺山 西域三十六國而限以葱嶺其河兩源一出葱嶺一出于闐在南山下與葱嶺河合水經葱嶺高千里行十二日可至其項 此亦水之極異者蒲類海 一名塩澤去玉門陽關二百餘里廣袤三

百里其水冬夏不增減一名婆惜海漢班超將兵擊伊吾于蒲類海是也

遺蹟

甘泉山明庭 在淳化縣北地理志黃帝治萬國朝諸侯乃作合宮兼明庭布政於甘泉

子貢遇丈人處 在漢陰縣境子貢南游於楚過漢陰見一丈人為圃畦鑿隧而入井抱甕而出灌用力甚多而見功寡子貢因與之論機械

戲亭 史記曰在新豐縣東南驪山半原蘇林曰昔幽王與褒姒游幸於此

阿城阿房宮 史記始皇三十五年營作朝宮於渭南上林苑中名曰阿房括地志曰雍州城西南面即阿房宮城東面也阿房者言殿之四阿皆為房也又曰阿近也三輔舊事曰阿房宮東西三里南北五百步庭中可受十萬人車行酒騎行炙千人唱萬人和其外有城名阿城東西北三面有牆南面無牆

獸圈 烈士傳曰秦召魏公子無忌不行於是朱亥奉璧一雙詣秦王王怒使置亥獸圈中亥瞋視獸皆血濺於獸面獸不敢動

鑄金人十二 史記始皇收天下兵器聚之咸陽銷

以爲鍾鍊鑄金人十二置宮中銘曰皇帝二十六年
有大人見臨洮其長五丈足跡六尺

野人塢 在鳳翔府城南秦穆公失善馬野人得而
食之者三百人吏捕得欲法之公曰吾聞食善馬肉
不飲酒傷人皆賜之酒其後秦伐晉三百人皆求從
報德遂脫穆公於難

大魚啣鈎 昆明池中嘗有人鈎魚綸絕而去魚夢
於武帝求去其鈎明日帝游戲于池見大魚啣鈎曰
豈非昨所夢乎帝取魚去其鈎而放之間三日帝復
游池濱得明月珠一雙帝曰豈魚之報耶

靈金藏 漢太上皇佩刀長三尺上有銘字難識傳
言殷高宗伐鬼方所作也上皇游豐沛山中窮谷有
人冶鑄問何器工者對曰爲天子鑄劍慎勿言曰得
公佩刀雜而冶之即成神器可定天下昴星爲輔佐
木衰火盛此爲異兆上皇解七首投爐中劍成殺三
牲以爨祭之工即以劍授上皇上皇以賜高祖斬白
蛇是也及定天下藏于寶庫守者見白氣如雲若龍
蛇吕后名曰靈金藏惠帝貯兵器名曰靈金內府
凝碧池 在唐禁苑中王維○凝碧池頭奏管絃
御湯九龍殿 在飛霜殿之南亦曰蓮花湯明皇雜

錄曰玄宗幸華清宮新廣湯池制作宏麗安祿山於范陽以白玉石爲魚龍鳧鴈仍以石梁及石蓮花以獻雕鏤巧妙殆非人工上大悅命陳於湯中仍以石梁橫亘湯上而蓮花纔出水際上因幸華清宮至其所解衣將入而魚龍鳧鴈皆若奮麟舉翼狀欲飛動上甚恐遽命撤去而蓮花今猶存又嘗於宮中置長湯數十門屋環回甃以文石爲銀樓谷船及白香木船致於其中至於檝棹皆飾以珠玉又於湯中壘琴瑟及沉香爲山以狀瀛洲方丈津陽門詩注曰宮內除供奉兩湯外而內外更有湯十六所長湯每賜諸

嬪御其修廣於諸湯不侔甃以文蟲密石中央有玉蓮捧湯泉噴以成池又縫綴錦繡爲鳧鴈致於水中上時於其間泛銀鏤小舟以嬉游焉次西曰太子湯又次西少陽湯又次西長湯十六所今唯太子少陽二湯存焉其窮奢而極慾古今罕匹矣

九成宮 在麟游縣西五里本隋仁壽宮唐太宗修以避暑更名九成宮永徽初又名萬年宮後復舊有歐陽詢所書醴酒銘碑書法遒勁爲後學所宗

古蹟

郭子儀宅 亦在親仁坊其西本于志寧宅譚賓錄

曰宅居其坊地四分之一。通永巷家人三千出入者不知其居。其里巷負販之人上至公子簪纓之士出入不問。或至王夫人趙氏愛女方粧梳對鏡。徃徃公麾下將吏出鎮去。及郎吏皆被召。令汲水持帨視之。不異僕隸。他日子弟集列啓諫。公不應。於是繼之以泣曰。大人功業已成而不自崇重。以貴以賤。皆游卧內。某等以為雖伊霍不當如此也。公笑而謂曰。爾曹固非所料。且吾官馬食粟者五百匹。官餼者一千人。進無所徃。退無所據。向使崇垣扃戶。不通內外。一怨將起。構以不臣。其有貪功害能之徒。成就其事。則九族齏粉。噬臍莫追。今蕩蕩無間。四門洞開。雖讒毀日興。無所加也。吾是以爾諸子皆服。

評 卽此識見可謂超絕千古可與權者

魏國夫人宅

明皇雜錄貴妃姊魏國夫人恩傾一

時於宣陽坊大治第宅棟宇之盛世無與比所居本韋嗣立舊宅韋氏諸子亭午方偃息于堂廡間忽見一婦人衣黃袍衫降自步輦有侍婢數十笑語自若謂韋氏諸子曰聞此宅欲貨其價幾何韋氏諸子降階言曰先人舊廬未忍所捨語未畢有工數百登房揲其瓦木韋氏諸子既不能制乃率家僮挈其琴書

委於衢路而嘆曰不才為勢家所奪古人之戒將見于今日矣而與韋氏隙地十餘畝其他一無所得號國夫人於此蓋合歡堂所費二十萬

曲江亭 在府城東曲江池西南唐時宴進士處

流杯亭 新說曰興慶池北衆樂堂後有宋太尉張

金紫所構流杯亭砌石成風字樣曲水流觴以為夜禊宴樂之所

韋曲 在樊川唐韋安石之別業林泉花竹號為勝境韋莊詩曰○蒲耳鶯聲滿眼花布衣藜杖是生涯時人若要知名姓韋曲西頭第一家

歷代石刻 唐石經唐明皇八分書孝經虞世南書

孔子廟堂碑顏真卿書顏氏家廟碑柳公權書玄祕

塔銘史惟則書大智禪師碑懷仁集王羲之書聖教

序顏真卿書多寶塔碑徐浩書不空碑吳通微書楚

金碑李陽冰書遷先塋碑及三墳記張旭草書千文

顏魯公坐位帖隋智永禪師真草千文碑王羲之筆

陣圖唐張長史壯痛帖邠國公修功德銘歐陽詢金

蘭帖李寂昌黎五箴賜辟雍詔幸學御筆手詔重修

文宣王廟碑建學勅本興軍創修府學記京兆府小

學規唐英書教興頌郭忠恕書三體陰符經興慶池

漢晏詩碑。夢英十八體篆。邵毓書。游師雄墓誌。慈恩
鴈塔。唐賢題名凡十卷。少陵樊察序。唐人登科燕曲
江題名。大名柳城題。金潘師重修府學碑。京兆府
重修府學記。楊奐書。府學教養碑。京兆府重修府學記。元
重修文宣王廟記。孔子加號碑。劉三吾撰。孝子李得
成碑。元勸慎刑文碑。七賢堂記。奉元路重修廟學記。
唐懷素法帖。夢英詩。帥正堂碑。夢英篆。千文碑。陽關
圖。華夷禹蹟二圖。歐陽詢書。化度寺碑。龐仁顯書。護
命二經碑。贍學田碑。

付留神

長安志中渭橋本名橫橋云云水經注曰

秦始皇造橋鐵鑿重不勝故刻石作力士孟賁等像
祭之鑿乃移動也橋之北首壘石水中舊有付留神
像此神嘗與魯班語班令其閃出付留神曰我貌醜
卿善圖物容我不能出班於是拱手與之言曰出頭
見我付留乃出首班于是以足畫地付留覺之便還
沒水故置像於水中唯背以上立水中其後魏武帝
重付留之像因乘馬見之驚又命下之

僊方 唐史天寶四載西域胡僧請于昆明池結壇
祈雨七日縮水數尺有老人夜詣宣律師求救曰弟
子乃昆明池龍也胡僧欺天求雨利吾腦命在朝夕

律曰貧道持律可求孫先生去老人至孫思邈邈曰
我聞昆明池有僊方若傳吾救汝龍曰此方上帝不
敢妄傳今急固無吝俄頃奉方而至孫曰汝還無慮
胡僧及至池水漲溢如故胡僧羞恚而去

段烈士廟 按三輔會要烈士段秀實廟在臨潼縣
西十里斜口鎮西南唐許渾題詩云○徒想追兵緩
翠華古碑荒廟閉松花紀生不向滎陽死豈有山河
屬漢家

爭上樹 在高陵縣南八里俗傳西域鳩摩羅什憇
此覆其履土遂生茲樹二月開如楊花八月結實狀

如小栗殼中皆黃土

寧王獵鄜 唐天寶中寧王嘗獵于鄜縣界搜林麓
忽見茂草中一櫃扃鎖甚固王命發視之乃一少女
也問其所自女言姓莫氏叔伯莊居昨夜遇賊賊中
二人是僧因劫我至此動婉含頰冶態橫生王驚悅
之乃載以後乘時方獵獲一生熊遂置櫃中如舊鎖
扃而去時上方求極色王以莫氏衣冠子女即日表
上之具其所由上令克才人經三日京兆奏鄜縣食
店有僧二人以錢一萬獨賃店一日一夜言作法事
唯昇一櫃入店中夜久膈膊有聲店主惟僧人日出

不啓門撒戶視之有熊衝人走出二僧已死乃熊傷也體骨悉露上知之大書報寧王云寧哥大能處此僧也莫才人能爲秦聲當時號莫才人嘽焉

輞川別業 在藍田縣西南輞谷唐王維置別業於此其游止有孟城坳華子岡茱萸泝辛夷塢木蘭砦等二十餘景

奉天城 在乾州唐德宗從桑道茂之言築奉天城外象龜形內列六街及朱泚亂果幸焉

凌虛臺 在鳳翔府東宋陳希亮知鳳翔時建判官蘇軾記在府治後堂壁

隴亭 在隴山官道傍唐時已有此亭童謠○秦隴無人塞草腥將軍一去泣空營漢家天子東巡狩行到江南又起兵

飛仙閣 即今武曲關北棧閣五十三間杜甫飛仙閣詩○出門山行窄微徑緣秋毫棧雲闌干峻梯石結構牢歇鞍在地底始覺所歷高

石鏡 在蕭何堰石門之上可燭鬚眉杜甫詩○蜀王將此鏡送死置空山冥冥憐香骨提携近玉顏

玉盆 在縣北八里褒水乃石生成不費斧鑿光潔如玉內有玉盆二大字

金華龍骨塔 宋修職郎游國佐銘○金華老僧巖公所居後洞獲龍牙角各雙并大骨數若干頰頰齧者十數枚其夕夢巨人縞衣告曰此山神龍所依樵牧觸穢龍且去矣今德人蒞吾境山復清潔龍當還來此其蛻也瘞之吉祥巖公異之乃即洞旁大磐石上累甃為浮圖盡取其牙角骨等藏焉

天漢臺 故址在縣治北宋王中題天漢臺望京樓詩云○池上有臺臺上樓聊憑舊址一增修仰窺日月三千界平見江山七十州春檻牡丹乘露賞秋船齒莖信風游仰思東北祥雲際百拜真珠十二旒

遇猿道 即嶓冢山宋王仁裕嘗養一猿名曰野賓一日作詩放之後裕官蜀至此山有群猿連壁下飲清泉一巨猿出群而前從者指曰野賓呼之而應隨行數十里哀吟而去

玉枕 在文縣境山有石狀如玉枕在巉巖壁間人跡所不能到但可望見而已有驛曰玉枕驛宋鮮于侁詩○群岡聳秀抱孤峯一枕依稀玉色同織女不知機石墜嫦娥翻覺海蟾空

東受降城 唐睿宗景雲三年朔方軍大總管張仁愿築三受降城敬宗寶曆元年振武節度使張惟清

名山記
卷之三
以東城濱河徙置綏遠烽南

中受降城 有拂雲堆祠接靈州境有關唐憲宗元

和九年置

西受降城 玄宗開元初為河所圯十年總管張說

於城東別置新城北三百里有鵝鵝泉以上三城俱

在河外今廢

遮虜障 漢武帝命強弩將軍路博德築遮虜障於

居延澤邊乃張掖酒泉出兵之要地也

記文

述征記

郭緣生

山下自華嶽廟列栢南行十一里又東迴三里至中
祠又西南出五里至南祠南入谷口七里又至一祠
又南一里至天井出井如望空視明如在室窺窓出
井東南二里至峻坂斗上又東至青柯坪則僕馬皆
屏去無用上百丈崖皆湏攀繩挽葛而後行今有石
磴鐵索攀緣而上其石磴止容一人縉紳欲登必須
着布鞋窄岫短衣仍以帶索束縛躡磴攀索而上或
膽氣不足而心多懼者登或可勉下則驚心褫魂實
難故韓愈既登此山及下時視其險絕遂心悸目眩
發狂痛哭投書與家人求訣華陰令乃百計取之然

後能下蓋如井綆汲水束縛而下垂之也其難下可知由是觀之則退之學力未至立處其心易動宜其遭貶輒有收骨之懼悅太顛而與之交也其答孟尚書張籍書亦下山後語耳或曰蘇軾屈險而止章惇則踰而不懼豈惇不動心而愈于愈耶曰惇所能者北宮黜之心愈所不能者孟之學後漢張旭華嶽碑序云山莫尊于嶽嶽有五而華處其一人主慶興必有其應故岱山石立中宗繼統太華授壁秦胡絕緒布五方則受其西列三條則居其中經有望秩之禮典有生殖之祀蓋所以宗山川而報功也

登太華山記

明 李裕

太華山奠雍州爲西嶽削成四方其高五千仞石壁雄竦群山奔附天順間余嘗巡按是邦道經山下仰望芙蓉明星玉女諸峰駢立天南層巒疊障如屏如幃彩翠雲濤競秀獻狀令人心目俱馳時王事靡盬未獲寄跡其間成化辛卯正月十六日抵華陰同謁太華祠肩輿出郭南行一里許騁目平原曲阜或凹或窪而深溪鉅澗水流觸石若轟雷吼村落中無崇林茂樹惟茅舍數家稍南渡澗折西而南四里即陳希夷庵希夷舉唐進士不第遂辟穀此山恒閉戶卧

名山記
卷之三
三十一
累月不起庵前有睡洞遺像在焉觀其辭召語云一片野心已被白雲留住九重仙詔休教丹鳳啣來襟懷飄灑翛然神仙人也余復肩輿折東而南二里至山麓皆巨石平布不可踰緣溪小徑行三里至張起谷是希夷墓所棺半露岩腹隱隱見之忽雲起風烈寒威薄人遂由山溪折西行五里趨靈臺觀

入華山至西峯記

王履

聞游者及青柯平仰瞻多自沮以故卒不敢往遣其僕慣登者二人導予翌日業行近山口泉聲琅然稍入殿角出灌木中僕曰此玉泉院也至院外觀希夷

先生塑像熟睡如生立清樾中諸道士出迎前導傍山對開神意飛動于時宿雲在巔群峭未出餘烟自旁山上塞朝陽射其端壁立之妙荏苒可得風觸壁鳴及澗其停滙處澄澈如鏡微漣動搖日影上壁中多紅白礫余盥頰清寒透骨試嘗焉甚甘美勝吾鄉陽山泉幾十倍澗北絕徑處實如柚者下垂僅越險取食之蜚口棄去西轉至小石洞洞外平石如枰中可參坐坐其上書所賦詩而東巖方洞適與之對意靈詭內潛遂相率以入僕曰此希夷匣爾蓋其葬處也棘梗道不得近因疑匣為函恐指所盛蛻者而俗

謂之匣與及上方峰峰直立鐵鑱下垂望峰端漫不可辨但峰腰雜樹倒懸斜倚而幽意可人鑱兩畔多小坎從下達上深可二寸僅容履端蓋登則緣鑱以託足者僕曰上有道士王友巖居惟玉泉一二道士時裹糧往食之鑱盡處及石罅號西玄門此峰蓋唐玄宗妹金仙公主駕鶴升仙之地而門則玄宗覓金仙而鑿焉者也從門入盤折數峰頂始及友巖所居南望連山不知所止上無雜草惟細辛一方不多產余雖搖中而憚險弗敢進坐峰根娑羅樹下瞻悵者久之由峰根北折度狹徑外則壑谷類也余問青柯

平遠近不對唯放歌倡答而去出樹外大石突立中豁若斧劈然僕曰此第一關也鄉人避亂時每入山壘石絕此予視關內尚亂石旁聚無數關右二里石虎踞因坐摹之忽不知四人所在厲聲呼不應跡之半里所則皆坐澗邊澗外瀑布正懸南崖端下激樹幹飛沫成白點因風容與久而後墜又百餘步則第二關也視第一關壯雖不逮而險則過之關內陰風勁甚不可留促步出返顧所來則一青靄耳復登頓詰屈數百折見平綠藹然林端既至乃青柯平山恰半從入山來悉崎嶇側塞夷者惟此草長過人岡之

祠西南則始攀鎖處也置杖草間聞松風颯然此以下皆雜木無松以上則純松矣蟬鳥遂絕詩人謂山深無鳥聲信然鎖曳危石上僕先進余亦攀過路縈紆並石根極隘瑟縮以行路斷接以木行則搖少進一峰前障不甚峻上大下小所謂巘也無草樹黑黃白相間上有赤白二圓形僕曰日月燾也復行餘二百步直崖巔立有短檝閣崖罅為級如梯鎖旁垂問之乃百尺撞也級每腐或缺由級以上先輕躡試之然後實足過此有類是而愈長者千尺撞也既上凡石之如嶠如扈如巋如巴山者眩視不可數抵前崖

徑忽斷崖峻削無可為徑者即崖腹綴小木如狗當絕谷之上凡三接始及徑鎖亦橫綴崖腹余目焉跡未及而先痿矣遣四人前度慮逼吾後以振也余趨起握鎖寸進之閉聽壹視步歇半木伊軋鳴東野登閣尚稱脚踏墜魂吾今何稱哉曰自咎以親枝履此險半時許乃得過問諸僕僕曰老君離垢也信仙凡之隔如是復斗折道松林中翳不見日毛髮聳然沈生謁禱山神祠懼蒼龍嶺之迅風也既至老木赤立唯東南一枝僅存微有葉根亂布石上若萬小蛇攢綴蠕動余駭焉貌其大較因思平日畫樹雖搜奇

嶺怪致巧寧得似此所謂盡不神於所做而神於所
遇也然而望蜿蜒入雲勢未知何以處此嘗聞登者
言度嶺慎勿旁視視則惡風至危不可度嶺凡兩折
中突旁殺如背色正黑鑱當背上竝鑱皆小坎亦猶
上方峰所託足者二僕先示所以登因四布伏嶺背
竊窺其旁則深不見底但見松頭濺濺出沒蒼烟中
萬峰羅拱向背高低邪正起伏若翠浪洶湧相後先
秀不可狀風颯爾有聲衆籟齊作杳盪奔激遠近胥
應憶登者言遂膽掉股栗不能動去上折無幾視若
天淵然風稍止尋進而僕已過上折矣予勉強盡一

折行上折覺稍便漸熟故也自嶺下仰觀將謂頂絕
無復過此及嶺端則峰頭插雲尚未知有幾里僕輩
弗喻促以西峰尚遠勿稽遂作以行至此則少上皆
徑於石鑱從橫罕無鑱者又越五六險始及鎮嶽宮
宮在西峰頂東諸神列坐不辯何神松罅間金碧參
差與日爭炫者嶽帝廟也及廟見道士王老師欵坐
廟之前則其居也窓在西壁隙有光開窓而其居則
度之懸厓之上俯瞰浚谷不見所極唯松頂麻萃斜
距窓二丈許峰壁峻拔自浚谷直上霄外略無突陷
真所謂削成者壁上松寄之壘間根直下如懸斲

蛇枝梢正拂窓手可接松實纍纍余提以斷甍弗中
墜下觸石且墜且觸聲如從甕中來良久始息至是
則頽陽向微霞彩漸發倚窓望西北平田無際荒烟
莽然中有涓水委蛇如龍日光射水中金燦不敢正
視居之南乃大岡頰類龜背色墨而粗澁岡下群峰
如攢劔如束筍無一渾然者予將摹之而嵐靄迷漫
弗果東望玉女峰殿正在峰頂雪壁爍日殿旁有物
似人非人往還松樹間遠不可辨岡稍南大跡一岡
上深可三寸長四尺餘旁鐫巨靈足三字竊謂力能
劈山其足跡僅如此得非不能載其形乎且東峰掌
其寒暑之異乃爾哉

上南峰記

明 王履

形自峰端達峰底假使所傳果然則如彼之大手而
配以如此之小足有是理邪東峰玉女峰昆季相倚
唯南峰巖焉獸陰風怒號御袂猶冷視蒼龍嶺裸體
其寒暑之異乃爾哉

拂旦起王道士出華山記相示行二三里稍疲坐松
根而四人已在石梁外高唱曰南峰至矣起而前僕
曰此希夷避詔巖也目昏不敢流盼竟不知已達巖
底因仰首怪狀可愕巖上覆似蜂窠然頗類太湖石
或類波濤蕩瀟所爲淡黑津津焉余坐觀自謂不世

音逢西南角一罅明透可側身入命僮掖入之及半見罅外樹梢動搖日影流罅中明闇稍分上滴瀝如雨陰氣挾罅風撲人巾服皆潤下濕不敢進僮曰壁有鐫字四行不辯何字由是自巖底北旋繞兀中度小榘又度架枝代榘者三若波舟之所搖蕩古松一根拔卧壑上闕道勃窣踰松上過得真武祠從祠畔上磴扶石闌轉峰角皆石版布道闌外臨絕谷試微瞰休然神懔閉目低首倚壁始定峰南上下壁削巨東西皆闌也異焉伏石版下覘蓋鑿壁成瑤以疊石置闌面之中窾石以入則所謂朝元洞也深可四丈

廣近之高又倍焉純白如雪中設三清像余問主者嶽師師曰昔賀老師營此四十年雖鑿焉而不敢碎石下墜墜則雷動龍潛故也自爾且鑿且運功未就而師亡繼以其徒甫就洞外西數步師又穴石版鑿以下達西轉則師之避靜處也沈生等躍然往觀予待二時許還曰穴之下則鑿雙垂鑿盡則版道也穴道相距不知幾十丈石杙插壁以當其中縋鑿下至石杙少息復縋至版道又少息然後攀鑿西行數十步漸高又數十步始及避靜處回視版道則載之銅杙之上而銅杙則插之峻壁之中外雖有闌木久多

腐以鍊是賴掩其振搖石杙一銅杙十七竟不知作時於何所置足闌之外下見松頂如灌莽在杳冥中師去此幾時其室其爨所猶在然非憑土憑於硯石之突崖耳室之西則別巖也巖類俛首形遙覆室上上鑄全真巖二字填之赤色然上下俱不可倚豈人履虛而作之邪吾初躡版道知有版道而已奚暇他及既至而得其所以始不知止於何地我輩壯年恃力不少怯今精奪於此矣去洞沿故路東行降八九折緣磴復升巨石錯峙石分處如甌丁視類井底點不見物然兩木倚石可下僕曰安真人肉身所沈

生率三人下觀及還談真人坐石龕不壞具衣履如生人抑坐逝處邪躋石以望見峰嶺群松如沃峰背類覆盂簷散如礪可縱步四人爭先若飛余至此已劫甚足不吾許殆及嶺憩龍潭旁掬潭水類面潭有三深淺不等深者不過二三尺僕言雖大旱此弗枯志稱頂有池生千葉蓮覓之不見不知當時騎茅龍天飛者其由此非與最高處一松孑立余倚松望信乎諸峰羅列似兒孫矣雲適生從玉女峰東峰兩間出倚風作嬾態欵突然北涌似顛崖狀既而復還漸慢于松巔不動如憇而山北所見皆漫漶不可識意

彼或仰瞻吾固在雲表也青蓮居士謂呼吸氣想通
帝坐非此而何尼父登泰山小天下彼果及此邪既
下又東行五龍神祠祠之外小碑一辭翰具美有渙
而為氣氣運而為精精變而為神神化而為靈等語
因愛而再誦

宿玉女峰記

明 王履

降而西二里許東折漸上至是無磴多倚木枝根石
間代為級皮脫滑不可登五人相與推援以進凡二
十餘處則玉女峰頂也嘗聞女冠楊氏名妓也少年
入山食松皮八年始火食或枵腹坐即大雪七日不

粒亦無恙竟日夜弗卧因訪之石室中尸坐如寐見
予起相揖笑曰此中罕聞人聲君何來之異耶余告
之故就問其入山時則三十有七歲今已七十有二
歲矣自云一生無病觀其顏雖非丹而精神粲然步
甚健固知其有養也引余步松間風適來激峰壁直
下如箭尋穿松林度壑而去相與立隩端因指西峰
東面窰隆如蓮花謂余曰此正西嶽蓮花峰也安有
峰頭玉井之產予至玉女殿道玉女所由觀洗頭盆
蓋石上一員坎爾水紺碧不乾集仙錄稱有五畝不
知何據之殿右觀韓姑姑遺蛻遣僮撤所障亂甃啓

棺蓋窺之殆如初歿者楊氏曰歿幾三十年矣雖槁不腐以杖擿其足亦不僵有道者乃如是蓋楊氏師也大石如龜殿正坐龜上而楊氏石室則籍龜腹爲之覆由殿前踰石梁北眺崇岡廓然然狸豸不能進岡半有大學焉楊氏曰唐玄宗禱雨拋簡處也下通黃河恐或然爾復旋至石室前指以近觀仙掌所在余與四人循東峰北行斯湏林斷豁然乃東峰之西北壁而玉女峰之東北巖也巖西竒如鳥喙距東峰不遠上豐下縮瞰即魄褫竒處小松一生附巖側不見根出巖上者三之二中無鱗而光僕曰此捨身樹

也游者抱樹轉數匝則獲福予僮聞即抱之轉不休峻遏乃止巖正當仙掌可察遂坐憶王涯仙掌辨謂峰有五崖北壑破巖而列自下遠望偶爲掌形俗傳則曰巨靈擘剖掌跡猶存余因思涯之所辨似得於傳聞未嘗如吾之近觀也殊不知膏出于壘溜以漸淡黃微白間之黑壁中上則五岐下則片屬岐者如指屬者如掌復有細溜無數雜五岐間遠望之則惟見其大者故五岐如指耳寧有五崖北壑破巖而列哉且膏所溜處比比皆有豈惟此掌爲然山石本黑其或淡黃微白者皆膏溜之色也此掌外惟日月巖

最多其次則東峰西壁近於楊氏之石室者色狀與此掌溜痕不殊但彼不類物形故不以爲異而不稱耳雖歷代碩儒詩賦同然一辭於巨靈之壁而不之難也將暮假宿楊氏石室中再請所有惟答以待盡而已余知其閉弗強也歛有光如燈度室前松林中僕輩驚指楊氏徐掩其戶曰與爾何預豈記所謂照明者與此亦可見楊氏之有定力矣與沈生步殿前以待月二更許光射萬松中碎影滿地風颼颼然自三峰來清固不勝寂亦難處因退寢不然知鐵鑊之所經始路何以識人何以登也郊說謂山行洗盡五

年塵土腸胃五塵土五十年不意中得此行雖遺一遺十而秀拔之神雄特之觀亦足以暢夫一主之拳跼矣 山峯極奇而險絕不知王公何以登陟文之奇怪亦與此山相當

游華山記

明 都穆

五嶽惟西嶽華山爲最高歲癸酉予奉使寧夏秋九月十八日出城南行八里至雲臺觀中舊有孟東野留題宋建隆初希夷先生重建折而西一里至朝元洞洞本在華山南峰上此其下院中之洞乃鑿土爲之不甚深廣人遂目以朝元非也院有老君殿其前

婆羅樹數百年物視其子類粟道士云灰之服以酒
可愈心痛東行里許至玉泉院洞有希夷先生睡像
黃衣束縑儼乎如生道士言聞之師像塑於先生存
時元至正間宣撫王守誠嘗摹刻於石今樹洞中院
東巨石如削刻宋陳古靈詩有亭名曰會景亭景殊
勝小飲數杯石東北古藤繞樹屈蟠如龍踰石復繞
樹如故道士言緣險甚難遂易冠服出玉泉命道士
前導東南數十步入華山神門二十步經總土地祠
石有流泉自山而下淙然可聽自此入山口旁山對
開若與世隔予神思飛越輿夫亦鮮予意疾行數十

步入五龍神祠按道家書載希夷初隱武當有五老
人來聽講易謂希夷曰吾輩日月池中龍也此非君
所棲令其閉目凌空馳風及張目已在華山石上又
謂希夷之睡乃五龍蟄法蓋龍所授也以祠觀之其
信然歟三里有大石突出崖際上覆如屋又二里道
多亂石遂扶攜以登石罅貯泉纖鱗金色或黑如墨
群游其中戲掬之忽潛不見予題名石上不自步聞
鳥聲不類或以爲猴也一里雙石竝峙道士云此第
一關內有古殿上厓刻第一關三大字下有小洞石
滑不可登四里至方洞壁有喬尚書希大題名洞後

名山言
懸瀑匯而為池分流下山右斗厓百尺名希夷硤其上類穴乃希夷蛻骨所在舊有垂鎖道士言嘗攀以上見骨盛木函色微紅香甚後有人竊趾骨以去道士憤之斷其鎖自是人不得上西折肆十步過第二關大石中分若斧劈者三里至娑羅平自入山五里即行石上崎嶇偪仄登頓勞甚土曠而夷僅見此爾道士言青柯平亦然爾雅謂大野曰平正以其夷而曠也平之西有八仙洞面洞厓石壁立每尺許即鑿為小坎深不可上令道士試之其行如飛猶猿猱然然亦危矣從者有一二人見道士上亦隨而上而不

知其習之熟也痛過之昊天殿南挺然孤高數千尺者為上方峰由下及顛亦有石坎獨以峻絕其鎖兩垂予豈惟不能登昂首視之固已目眩而神驚矣從是而上草棘蒙道鈎人衣袂隨披隨行五里厓腹挿木上布以上行僅容足越之始知九萬回顧大聲曰此非連雲棧邪則皆大驚二里泉出竇間飲之甘冽名涼水泉衆倦甚少休泉上青柯平道士持茗來獻一里道士指西崖云上有北斗平紫微洞惜不能至又五里及青柯平入通仙觀觀在日月巖下離地數丈有洞前為焚修之殿攀鎖乃上崖左銳而高者西

名山記 卷之三 四三一
峰也相傳自平登其巔七里右為寥陽澗當其前者
為混元殿遂宿觀中晨起東上四十步有石若怒獸
張頤中像土神名土地巖又上六十步石側讀元人
重修通仙觀記其下卧石塞道曰回心石中隆旁殺
俯瞰斷崖千尺予欲度石九萬輩以雪花飄墮頗有
難色而從者亦皆予止予笑曰吾回心矣各以杖扶
之而下數里雨間作衣履霑潤而汗流浹背問之青
柯平則猶雪也因嘆地之高下而寒燠乃爾昔之人
謂鳥聲不上青柯平非以其無食亦以高寒而然也
或有謂予好奇而不能攀鎖以盡三峰之勝若以先
人遺體而履此不測我豈敢哉

游驪山記

都穆

驪山在西安之臨潼縣南半里即抵其麓經雷神殿
東折門有綽楔榜曰溫泉池過此有室三楹啓其扇
即溫泉也人呼為官池蓋非貴人不得浴此池四周
甃石如玉環狀中一小石上鑿七竅泉由是出相傳
甃石起秦始皇其後漢武帝復加修飾或云今之池
後周天和中造又云唐玄宗廣之室之內有古今石
刻歲久錯亂弘治癸亥知縣事者聚之壘於門外儼
若屏障官池之左有泉曰混池以浴小民東行即華

清宮故址上有三清殿前卧一巨鍾視其款乃華清物又有二碑右為後魏溫泉頗惜多剝落左刻金尚元龍草字其陰刻劉子顯成道記子顯山中道士宋仁宗朝嘗召見賜號凝真太師三清殿後為玉皇殿面三清者七星殿也南上十五步為玉女閣下有方池即溫泉發源處飲之可以已疾每秋暮人取未熟柿投其中經宿食之不澁其左為玉女洗頭池沐髮者多去瘡蝨山之半平坡朝元閣舊建於此山左肩曰東繡嶺右肩曰西繡嶺當時林木花卉之盛類錦繡然故名閣與華清之廢皆不知何時其易為道士

之居則後晉天福中也又上二里為老君殿舊云天寶七年十月老君見於朝元閣南玄宗於其處立降聖觀琢白玉石為像今尚存殿壁繪唐從臣之像殆當時人筆其西南有泉名飲鹿槽今涸又上二里為老母殿老母即唐李筌所從受陰符者山之巔舊有烽火樓昔周幽王欲媚褒姒舉烽火以來諸侯之處下山浴於官池其清徹底不火而熱支體融暢夙痼頓捐快哉東行八里折而南二里至秦始皇陵陵內城周五里舊有門四外城周十二里其址俱存自南登之二丘並峙人曰此南門也右門石樞猶露土中

陵高可四丈昔項羽黃巢皆嘗發之老人云始皇葬山之中此特其虛冢其言當必有所授也

游終南山記

明 都穆

癸酉八月予以使事寓秦會舊僚田君有年約以中秋翫月終南山中出城南門而秀才費樟復陪以行三十里經樊川漢將樊噲嘗食邑於此在唐爲韋安石別業又名韋曲岡巒迴繞松竹森映而水田蔬圃連絡乎其間秦中一勝地也杜子美○韋曲花無賴家家惱殺人綠尊須盡日白髮好禁春石角鈎衣破藤枝刺眼新何時占叢竹頭戴小烏巾岡之上登牛

頭寺僧愚聞官人至悉遜去予以所攜酒共酌松下寺舊有唐貞元中徐士龍撰徧照禪師碑今不存所存者仙人丘長春詩刻拂塵讀之韋曲之東有杜曲乃唐相杜岐公所居當時語云城南韋杜去天尺五言邇京也岐公孫牧自吳興守入知制誥盡以俸金創治其野嘗曰富貴有數吾得老爲樊川翁有文章數百號樊川集顧草木禽魚亦無恨矣離牛頭南行四十里至終南山入普光寺在山之麓息足磐石又二里道益峻險遂舍肩輿躡亂石冒懸崖屈曲而上西有日月巖下刻篆書松泉二大字又上至抱子巖

名山記 卷之三
經玉泉洞又有八仙洞在山之西壁限以流泉非跣足不得入又有石儼若老嫗憑巖而休左石圓石明可鑿物謂之石鏡再上則激源池也池一名太一湫其上環以群山雄偉秀特勢逼霄漢水廣可數丈深丈許錦鱗浮游人莫敢觸鱗之大有二三尺者自昔禱雨咸在於是其南即太一殿惟一道士居之王維詩○太一近天都連山接海隅白雲回望合青靄入看無分野中峯變陰晴衆壑殊欲長人處宿隔水問夫殿左有三官雷神二洞所謂金華洞者在山之最高處道士云洞有積水然不能至也田君與費生以疲極卧三官洞予面池獨酌下山復至太一宮方舉

杯適長安令送酒飲興益豪題名壁上晚回至普光予欲翫月上寺過門不入命輿夫疾行上山道悉甃以石而松柏梨栗夾植其旁遇險則趨別道已而復故蓋五里而始至寺孟郊詩○鳥飛不到處僧房遠步出白石上坐依清澗邊地曉松桂短寺有方池名坂險道塗偏晚磬送歸客數聲落暉天

曰仰天跨以石梁於茲宵翫月為宜張筵池上而浮雲滓空衆頗弗懌予戲謂之曰昔人詩不有絃管吹關之句乎命小閣黎取笙簫雜奏之倏焉雲開月朗則皆大笑謂予言之不妄也十七日下山從別道回二十里至興教寺內有三塔其中塔特高大為唐三

藏法師玄奘瘞身之所尚書屯田郎中劉軻銘左爲
慈恩基公塔太子左庶子李弘度銘右則大周圓測
法師塔銘之者貢士宋復也寺之北舊有玉峰軒宋
元豐四年知永興軍呂大防建今廢惟長安令陳正
舉記石僅存

遊石龍澗記

明 都穆

邠西北多山山之中有石龍澗者境號勝絕歲癸酉
秋八月四日子以使事道邠知州事古恒齊侯聞子
之嗜山水也請爲龍澗之遊翌日與鄉進士兩劉君
出州西門不百武入顯應禪院院舊名普照中有碑

乃金正隆間僧所撰院記侯舉酒酌客畢跨馬去予
與兩劉君尾之行四里渡涇河深可一尺昔漢武帝
祀甘泉至涇橋有女子浴於水乳長七尺侍中兒寬
曰天星主祭祀齋戒不潔則女人星見即此水也又
五里由小谷入山盤旋以上石壁千尺殊形詭狀而
懸溜點滴霑人衣袂緣厓行下視澗壑目駭心悸側
身而進前後爰之以人數百武至五龍神祠祠創於
唐大曆中久廢唯存元延祐三年禱雨有感碑近齊
侯亦以應禱重建祠焉所謂石龍澗者在山之巔路
斗峻人鮮能至曾有至者言澗乃一大坎中刻石爲

龍形然不知埋自何時延祐碑謂禱雨以器取渦水
迎置城隍祠中雷即殷殷起座隅久之大雨霽霽齊
侯之禱唯焚香瞻禮忽坎中出雲瀰漫山谷而雨隨
至可謂靈矣其飲祠下時日已墜西山圍石遶陰風
襲人衆衣薄殆不能勝命從者張蓋衛之予意祠之
刻自唐逮今斷碑殘刻或有隱瓦礫者除之果得石
刻乃金崇慶二年靜難軍節度判官汴梁張瑋詩二
絕邠在唐爲靜難軍金之官襲唐制也詩前有小序
其一題昭慶院○招提高據半山隈蒼栢青松頂上
栽日暮荒村無宿處主僧邀我寺中來其一題石龍

渦○深谷團欒渾似冢飛泉滴瀝不干雲此間正是
神龍宅莫惜甘膏爲我分

此詩皆州志所不載

關中三山志

明 何景明

終南山在西安府南五十里東自藍田縣界西入咸
寧縣界石鰲谷以谷水出與長安咸寧二縣分界要
義曰太乙一名終南山關中記曰終南一名中南言
在天中居都之南也又曰終南太乙左右三十里內
名福地三秦記曰太乙在驪山西去長安二百里一
名地肺山東方朔傳曰終南山天下之太阻也其山
多玉石金銀銅鐵豫樟檀栢異類之物太白山按三

秦記曰太白山在武功縣南去長安二百里不知高幾許俗云武功太白去天三百周地圖記太白山甚高上常積雪無草木半山有積雪如瀑布則澍雨人常以為候語曰南山瀑布非朝即暮水經注曰太白山南連武功諸山最為秀傑冬夏積雪望之皓然吉茂蘇則值亂隱於扶風南太白山中按太白武功二山在郿縣蓋舊武功縣地也今武功縣本無此山華山太華之山今在華陰縣西南山海經云華山之首曰錢來山其形削成而四方其高五千仞廣十里命曰西嶽又西八十里曰小華山又西八十里曰符禺

山又西六十里曰石脆山又西七十里曰英山又西五十二里曰竹山又西二百里曰浮山又西百五十里曰峙山又西百七十里曰南山又西百八十里曰大時山又西三百二十里曰蟠冢山又西三百五十里曰天帝山西南三百八十里曰臯塗山又西百八十里曰黃山又西二百里曰翠山又西二百五十里曰驪山自錢來至於驪山二千九百五十七里按華山三峰中一峰東西二峯崑峙盤旋峻極不可窮覽何景明曰太華終南太白實一山延亘不絕太華在華陰終南在長安太白在郿各望其地異號命爾其

山首枕高芒尾貫羌蜀表裏秦關蓋邦域大紀云

游玉華山記

宋 張岷

宜君縣西南四十里有夾道而來者玉華也其南曰野火谷望之如爨烟而莫知其所自也野火之西曰鳳凰谷則唐置宮之故地也蓋其初有九殿五門而可記其名與處者六其正殿為玉華其上為排雲又其上為慶雲其正門為南風南風之東為太子之居其殿曰耀和門曰嘉禮知其名失其處者一曰金飈門也過而覽之惟野田荒草而已其西曰珊瑚谷蓋嘗有別殿在焉珊瑚之北蘭芝之谷昔唐太宗詔沙門

玄奘者譯經于此其始曰肅成殿後廢而為寺云中
有石巖嶄然天成下有鑿室可容數十人有泉懸勢
若飛雨有松十八環其側皆生石上高可十尋端如
植筆其西南有崖曰駐鑿其始入也雙壁屹然如削
石而成既至其處若視甕側有泉飛而下如懸雨噴
珠其名曰水簾稍北有崖與泉亦若是而差小治平
三年夏余與六人者來游乃相與坐石陰松聽泉而
飲之已

游九巖山記

明 喬宇

五月至涇陽王君應韶來會遂同由縣北往九巖山

謁唐太宗昭陵緣坡行二十里至焉其山周圍十里
有廟頽簷內有石刻青驪什伐赤特勒驃颯露紫拳
毛馱白蹄烏六駿圖尚存即太宗平竇建德王世充
宋金剛劉黑闥薛仁果及東都時所乘者是夜與應
韶對酌而歌遂宿于齋所明日登山之絕頂浩然四
顧終南太華遙拱于南鳳翔諸山聯帶于西其陽則
秦川萬派流雲漾日邈邈歷歷一覽可既題名畢下
山北觀昭陵從葬之墓其逼山者即所謂諸王七墓
公主二十一墓妃嬪八墓皆無碑稍次即宰相房玄
齡以下十三墓丞郎唐儉以下五十三墓功臣大將
何史那忠以下六十四墓今皆狐居兔旋纍纍崎嶇
或崇或頽或稍而微或圯而夷或泉或潰其在當時
雖有椒房天潢之貴鑄鼎絕世之勳邁類超倫之智
今皆托體山阿身埃骨朽不亦悲夫遂與應韶愴悵
弔之以詩 讀此記令人塵慮如冰

游玉華宮記

宋 盛南仲

予幼讀杜子美玉華宮詩愛其諷刺深切元祐辛未
得麾中部所謂玉華宮者在州之西南窮山之中既
覽州經山圖疑未能盡狀其形勢一日王微之行縣
鎮說玉華遺事將往觀焉微之亦善丹青者因別續

草本而又得張岷所游述宮記考其舊圖曾不髮髯
微之凡三往盡得其形容別作絹本今置於州之通
濟亭好事者視其圖不游山而知玉華之為邑境也
予既解組東歸夜宿玉華微之又來送別得以窮視
其間騎蘭芝谷駐鑿堦視野火坑觀其飛流噴布巖
谷深險夏有寒泉地無大暑真野人所蟠之地也詩
所謂遺構石馬今不復有但十八松存焉昔唐文皇
平定宇宙偏師一出則擒王滅國如翻手焉貞觀之
治幾于三代所不足者萬歲壽爾一日伐高昌得婆
羅門合不死藥服之無驗而有內熱之疾以至厭九

重之居常避暑于空山作為離宮屈指無百年而遺
跡殆盡高宗之世賜玄奘翻譯而后為浮屠居矣使
後世英魂不得傳真于玉華之中可哀也已子美詩
云○不知何王殿遺構絕壁下其傷之意深乎哉

游南山記

明 王九思

正德庚辰春三月癸巳大復何子校士鄠杜約予游
南山內申南行二十里抵金峰寺寺背山山下出泉
甃為井乃伏流佛座下至院亦甃為井復伏流至門
外達于平地為溪院僧利灌溉則閉井北口上水由
泉西緣岡南抵山半樹木離列乃坐飲數觥下出寺

東行半里許抵化羊宮東澗水出焉道士引別支經
流庖舍後接竹入水于釜由宮後南行渡小澗陟岡
其上平坦可數畝多檜東臨澗水坐飲移時甚樂也
出宮門北望則嵯峨九巘諸山隱隱若黛並山東行
三里許抵重雲寺南向坐懋圭峰在前如人拱揖又
東行七里抵棲禪寺即所謂草堂者也蓋姚秦時鳩
摩羅什自西竺來爾時未有寺爲樹草堂譯經其中
其後建寺始定今名而俗猶呼草堂寺云前殿書壁
甚古西南爲鳩摩羅什塔有亭覆焉前朝詩刻甚
多獨金趙閑公詞翰爲盛明道先生詩註云寺在竹

林之心其竹蓋將十頃乃今根株盡矣獨寺後銀杏
四株上薄霄漢亦百年外物也門外諸峰蒼翠如畫
東南林薄中有唐圭峰禪師墓塔其西南入峪數里
爲紫閣峯有瀑布景特奇絕又五日縣令王子明叔
邀予西游樓觀比至則諸公已先在乃相攜至老君
殿臺上席地對月坐飲于是德丞鼓鳳琶歌予所製
越調曲感激憤厲諸公擊節嘆焉已又據席飲各倡
和詩爲樂明日明叔陪予登紫雲樓樓兩層其上爲
玉皇像北面其後灰壁南向爲山水人物畫蓋甚奇
非今人筆也憑闌一目千里既下與諸公觀老子繫

名山言
牛栢栢下石牛卧焉。已乃南行四五里抵說經臺盤
屈而上絕頂為宮三楹中塑老子尹喜像其四壁畫
前朝君臣逸士像蓋有功德道德經者前門內古栢一
株俗說既死而聃鍼之活誕不足信仲默于宮前碑
側書予六人者姓名邑里經游歲月云已乃坐後殿
廊下飲明叔又請西游仙游寺于是下臺轉折西行
既數里見山麓一塔巋然問之唐一行僧塔也又數
里過康子彭麓莊又西行數里轉折而南道路甚險
東崖山西岸黑水下視毛髮森豎又里餘抵寺寺榜
曰普緣蓋此地故有仙游宮俗亦因呼其寺云寺四
面皆山黑水經流其門蓋奧區也登毘盧閣已乃觀
殿前石塔塔下空中塑一病佛側睡且死諸羅漢按
摩哭泣籲禱備極情態康子戲曰佛亦有此無常邪
相與一笑已乃出門門西瀕水二石塔上刻吳道子
畫諸佛像有東坡題名北岸山上泉下瀉有聲其傍
石洞後漢馬融嘗居焉

仇池諸山志

明 何景明

仇池山在鞏昌府成縣西一百里寰宇記在成州上
祿縣其山高峯萬仞自利州來其東西二門盤道可
七里元和志載宋書氏胡傳云仇池方百頃四面斗

名山記 卷之三 五十四
絕高平地方二十餘里羊腸盤道三十六回山上有
豐水泉煮土成鹽范曄後漢書河池方百里左右皆
曰白馬氏麥積山在鞏昌府秦州東南八十里去舊
天水縣東百里狀如麥積爲秦地林泉之冠上有姚
秦所建瑞應寺山之北曰鵬巢谷有隗囂避暑宮對
面瀑布瀉出蒼崖間又有魏乞弗後墓鎖林峽在臨
洮府城南六十里曰史家灣洮水所經會灣之右即
南山麓路引一線穿麓入峽峽之阻諸峯聳峭兩岸
懸絕故山逼峽隘林木鬱森四封固蔽而無所通故
曰鎖林其桃源自蕃疊戍界與岷江分派江東行者
北經岷州穿鐵城旋入萬山間凌波盤渦倒山堙谷
而來遂受吞此峽適一登臨則衝波騰浪激湯險壯
突出峽口滔滔巨野逼府城而去龍門山在舊大安
軍城五里去今沔縣南六十里官道之傍懸壁環合
上透碧虛中敞大洞下漱清泉宛然天造水簾懸夏
冰柱凝冬宋文潞公宋景文皆有留題行三里又有
後洞蘇元老龍洞記自利至興行五百里幾半蜀道
而巖洞之可喜首莫如龍洞重簷厦屋深不可測
如此險奧別是一番境界

名山記 卷之三 五十五
游牛山香溪洞記

明 劉閣

金州境內多名山乃歲丁亥秋九日與白庵出萬春堤三里所至牛山山之下有忠惠王祠唐刺史崔偉能慈惠澤民中和三年黃巢作亂太白山人者踏門獻計曰公毋恐一發牛山則巢滅掘之得一石桶黃腰獸栖之而置劔其上獸見劔自殺巢果敗公由是得道宋嘉泰中封忠惠王元紅巾起樹陰旗殄賊相傳所掘山在五十里外此其行祠然山亦巖業可觀二里所至漢江泛舟江源出幡冢山嘗至石泉紫陽諸縣皆兩崖峭拔壁立水流其間數百里至鄖西始見平原舟中對酌聞高鳥聲雜出叢薄樵歌與漁唱

互答頗發吟興江中有安康石翳沙磧見則歲飢余竊窺之石粼粼見波底顧謂白菴曰果然吾輩憂也罷酒升輿五里許至心山山有異草風吹之不偃無風乃自搖漢陽厥守漢中過而異之棄官修仙此山復二里所至魏山三面險絕惟北小徑可捫葛而升晉吉挹督護梁州秦韋鍾來寇挹嬰壘急口岐山固三年不可下固知茲山之阻可壘也又三里度香溪溝入崇山中有石洞相傳呂洞賓郭尚灶傳道茲洞洞前有石棋枰及子人不敢取尚書胡濙詩鑿石壁令從者交棘通道前後推輓二人並詣其顛山約數

名山記
百仞高近眺西北巖巒巨疊白菴嘆曰焉得寒裳一
并討乎余因指燕子嶺謂白菴曰徃劇盜淡文省巢
據茲山距邑二百八十里余提兵徃撲之七十里經
鳳凰山又指而視白菴其山盤二十里中有十二層
崖甚竒以戎事不暇登又三里所經桃林異之而亦
不暇問至燕子嶺城賊訖暫詣山中草菴有老比丘
曰稱元時人頭白而顏紅問其年不記也詰其度牒
則曰有出視之紙厚方可七尺許字如紫蚪盤蛇蒙
古書也見余跣趺坐驗其牒與年等縱之回軍至桃
林旁圍高中低而夷草舍置中堦石澗泉繞舍左右

流一道人年可九十餘而色不槁問之曰採桃實自
給耳左右耳語曰道人頗豐積余因戲之曰聞道人
甚饒可餉諸兵一殮乎曰非都竈不給具食其它則
可留宿明發人具折供二千人無漏者歸而復召二
人皆不知所徃矣夫秦政暴毒遠在禹州且避亂入
桃花洞況關陝近切湯火能無幽遁萬山如桃源客
乎則燕嶺鳳山固有希心異人而求不死之鄉如老
比丘道人者無疑不與之談接者尚多也乃與白菴
憑高遐覽東則鄖襄諸山南則劔閣子午谷西則終
南棧道北則商顏秦嶺或筭植天表或丹青一抹撒

豆積黛隱約蒼霧間。目眦盈溢神情敞。朗儻能標長
組履不借鞞。盡凌雲磴吊四皓。諸葛武侯韓昌黎之
遺跡已而歷青城峨眉籍葛陂之龍以與朱桃推封
君達諸公邀翔埃壒之外可乎。白菴曰榮願系人遠
心莫暢相與嘘唏者久之。○太白山人獻計甚怪

與鄉中知舊

明 胡松

僕四月入關分守關西理在涇潁涇雖荒落陋瘠然
所過西安所部平涼鳳翔則皆古賢聖豪傑誕育經
營之地固平生之所寤寐快覩者。遇行部必迂途往
觀用以激昂砥礪試為諸君誦焉。方自靈寶出函谷

望潼關見黃河迢迢從西北來切抱關麓而太華三
峰高矗東南歷歷如畫乃賈生所謂踐華為城因河
為固者今猶宛然真稱天地之險使秦漢唐隋稍能
布張政教用維其人豈有敗與亡哉。自關行六十里
至華陰縣縣正直太華西嶽廟在縣中宏壯不可言
又六十里至華州遙睇驪山諸阜信若培塿兒孫然
又五十里至渭南渭源出鞏昌之烏鼠同穴山迤邐
而東行可千餘里合汧漳鎬戲漆沮澹灞灃潏涇汭
諸水西至于華入河而斯邑適在其南又八十里至
臨潼所謂華清繡嶺僅存其名茫茫惟土至驪山亦

不甚高惟溫泉如昨然當年繁華侈盛俱隨浮雲流水散矣為題古今殷鑒四大字於驪阜而去自是西行則新豐鴻門灞橋皆在所歷過橋不三十里入長安履任經長樂里登西南城望終南諸山高入雲表張屏列障儼如卷畫橫帶會城周際而山之下周方數百里多秦漢故渠膏腴沃壤古所稱天府陸海殆調斯域外此則昔所習稱未央長樂諸宮上林樂游諸苑與昆明曲江棘門細柳雲陽豐鎬杜陵韋曲樊川御宿歷歷皆在目睫指顧之前乃憶唐人所云宮中下見南山盡者真實語也四月念日出長樂赴涇

原路當西出咸陽為欲至終南游所謂祖菴樓觀者乃東出長安門望鄠縣行可七十里鄠古崇侯虎國也後文王奉天伐之作豐邑路皆廣原平陸中有渠通長安渠上垂楊夾峙參天合抱長亦五六十里不斷人行樹底殆不知有夏出鄠縣里許為漢陂上為紫閣峰峰下陂水澄湛環抱山麓方廣可數里中有芙蓉鳧鴈之勝杜子美所云半陂以南純浸山者也恨不得岑參王維少陵其人載酒從之游又四十里至祖菴元王重陽道場也有石刻遺像與其手書書亦飛動奇詭又十里至樓觀觀蓋老子與關令尹

喜傳道處也。上有說經臺，臺在終南山腰松阡石徑
迤邐而上，最上有洞，可容數十百人，非惟西北所無，
殆非人境。又二十里，至盤屋，盤屋形勝膏沃，與鄠埒，
而長楊五柞舊宮皆在其境。又七十里，至武功，武功古
郃國，后稷舊封，禹貢所載，惇物若秦嶺，藍關於子午
谷，諸勝皆在東南，睇望中，又數里，輿人遙指馬嵬坡，
會曰：欲暮不能往，然問俗所傳，士皆成粉，非實事，憶
哲婦傾城之詠，爲歎息久之。又七十里，至乾州，乾於
唐稱奉天，從此地漸高寒，有邊鄙意，出乾州北數里，
經乾陵，則天葬處也。所遺石翁仲，人物雜卧，土石草

樹間甚鉅且衆，則當其盛時，雄麗可想。然行道之人
語及盜掘，亦多詢而羞之，真稱遺臭。豈若昭陵，抔土
漫然九巖山下，之有耿光耶？從此過永壽縣，至郃州，
郃本稱豳，玄宗開元間，因郃岐周府兵，幸其地，以豳
近幽字，改今名稱。至今入其境，則陶穴纍纍，如見公
劉時人，而所云凌陰室，履跡坪，與其隘巷種種，故在
北望甘泉林光諸故址，爛焉未滅。而甘泉則黃帝祭
天雍時，萬靈明庭處也。西行百八十里，至涇州，涇以
涇得名，水切城麓。詩大雅所謂，密人不恭，侵阮徂共
者，皆其境內。其即土人所稱其池是也。回中山在其

城北一里許其下爲涇河泂水從西來屬涇城東南流數百里東至於華陰合渭而泂之源則出隴州城北弦蒲藪詩言泂鞠之即是也蓋關中山最多而水亦無慮數十其最大者爲黃河次則涇若渭其旁諸水數十則皆隨在入涇渭從涇西行百四十里至平涼平涼於春秋爲朝那漢析置安定郡故又稱安定渾城會盟壇在其城西北五里今惟名存西行可三十里至崆峒山問道宮在焉志稱黃帝問道廣成子於斯山而山高際天峰巒聳拔信是仙靈之宅又西七十里而羨過蕭關漢文帝時匈奴入蕭關燒回中

宮即其處然宮址莽不可辨矣又八十里至固原原即詩所云薄伐獫狁至於太原者本是侯服然地近北邊風氣高冽八月中雨雪者再秦文王所爲詛楚於朝那湫者在焉然有二一在州東二十里一在州西三十里水各方數十里深不可測傳有蛟龍藏其中人莫之敢狎然歷世滋邈忘其本名土人但稱東西海子云而西海子水流百數十里經隆德靜寧兩界而好水川也宋與夏人大戰場在焉東望環慶延安境相銜以追憶韓范經營殫勞心力然卒罔底績豈自古豪傑功業之成亦籍天幸與國運耶乃若乎

涼東北百六十里則為鎮原縣漢潛夫王符之鄉也符才足用世而限於衰季。嬖倖塞塗弗克行其志。今讀其書甚可痛。金泰定間州守种某嘗作思潛亭於其書臺舊址。然又廢而土人莫之知。余為立石其處。章表之。此皆平涼東西北境也。率以防秋之役行視焉。又夏日出按鳳翔則由涇東南行百餘里至靈臺。靈臺之名雖古。然非詩所歌詠。特以文王為西伯征密須。嘗過其境。後人神明其地。築臺以識。遂名至今。而古左丘明晉皇甫謐隋牛弘唐牛僧孺寔生其壤。今其祠墓宅墅巍然而存。又東南百里至麟遊縣。

南五里九宮故址在焉。祇存歐陽詢書記一石。而字多剝落不可讀。所謂十二層樓闕苑西者。惟翠巘丹梯尚無恙。爾然古木枒槎半無枝葉。欹斜偃側巖壑無光矣。又南八十里至鳳翔。鳳翔秦故都也。秦雖起西戎有非子者為周孝王主馬於汧涇之間。馬大蕃息。封為附庸。邑之秦使續嬴氏之祀。故今城中有穆公與三良墓。余行過之。則唾彼繆之謬。而重興黃鳥之哀焉。登城以望。見岐及梁山。奠其東北。岍與吳山。亘其西南。襟帶環合。居然一大都會。雖其雄偉廣博。差謝長安。而聲明禮樂。殆踰他郡。又城東門外有東

湖即大旱不涸花木水竹之勝舟楫壺觴之適無讓
江鄉而凌虛臺喜雨亭址在其北陬今則復為荒烟
野草如蘇長公之臺記語矣從鳳翔西行七十里為
汧陽汧於漢屬隃麋縣耿況嘗封于其邑又有唐人
段太尉秀實祠汧蓋其鄉也又西七十里為隴州而
吳山在其東南七十里號西鎮然在周職方則稱岳
李義山所稱吳岳曉光連翠巘者是也巖石聳峭林
木秀阻九峰離立如笋拔地而舊志第稱為五峰余
為數之實有九數已刻其說於巖壁豈帝命巨靈雕
刻鑿削特示工巧其勝乃若是耶又東南百餘里為

寶雞大散關在其西南數十里路通褒宋與金人百
戰爭得之而石鼓山在縣南二十里陳倉山距縣東
南百十餘里志載山上有石類山鷄晨鳴山頭則聲
聞數十里而縣因以名縣南十五里有曰益門山者
所從入蜀道也棧閣蓋寔自茲始縣東南八十里為
磻溪溪流注渭旁有石室傳為太公所為避紂地東
坡為鳳翔簽書判官時夜遊詩有○夜入磻溪如入
碛照人炬火落驚猿蓋實錄也而穆公女弄玉鳳女
臺元貞人丘處機清鳳臺皆在縣東南六十里外至
張三丰菴則在縣東三里焉志稱三丰洪武癸酉秋

七月念日自言當逝留頌以別邑人楊軌山等爲置棺斂比葬發視之三丰復生後入蜀見蜀王又入武當山或遊襄鄧間永樂中嘗遣使尋訪竟不遇爲宮以待之余他日遊武當親見成祖所爲招三丰手書當不妄去寶鷄東南行數十里爲岐山縣縣西八十五里爲岐山中有周公太公召公三廟巍然並峙而岐山之南數里而近則爲郿太白山峙其東所謂和尚原五丈原斜谷關者則分峙其西誦出師未捷身先死之句爲之淚下若東南五十里則有橫渠先生祠其北二十里爲郿塢漢董卓所爲貯金積穀微

覬富貴無窮者夫張祠董塢地相距甚邇而使人貴賤愛惡至與天地隔若此然則吾人百年易盡之身其惡可不適修厥德也歟又東爲扶風漢畿輔地其人則馬援傳毅馬融諸子望於其鄉又東則醴泉咸陽雖非余所守然往來會城必道焉咸陽故阿房宮址褰帷四顧但見蒼蒼雲木離離禾黍泔泔泉流彌漫近遠爾又北行以望周文武諸陵若漢高長陵祇遺數大阜近道側其餘環長陵者以百數纍纍錯落率如屋如鍾如釜如困如廩如積不知其爲后歟王歟將歟相歟公歟侯歟祇增嘆息彼貪且惰者可以

悟而省矣 此書有學識有經畧有感慨

東西女學洞記

唐 杜光庭

長安富平縣北定陵後通關鄉入谷二十餘里有二洞一名東女學一名西女學其東女學崖壁懸絕洞門在崖面躋攀不及夜往往聞讀書之聲其西女學約山有路可到洞門近門一石室可容一二十人其洞門時有人秉燭可入行一二十里兩向有五門皆各有題記或通蓬萊及諸仙境近年有石摧下遮閉洞門不通人入又山頂有一天井直下深二丈許有自然橫石旁出石下天井亦可二丈餘可通人過其

底旁有崖龕梯磴而上屈曲甚廣龕內有道經數萬卷皆置於柏木板牀之上有一石人俛首凭按而坐形如生人天井之底有道門所投之簡委積朽爛不知其數其大順年中富平奉道人姓徐第七曾於洞內取養生經出外傳寫卻送山洞中又向北行二十餘里有三泉山谷中有石山嵌可容三二百人當谷內有三石盆其盆各廣丈餘制度光滑殆非人工三盆涌出泉水常滿餘水流出山外古老云時有仙人浴此盆大都此山有人觸犯即立致雷電損傷苗稼由是鄉里多隱蔽蹤跡難於尋訪山上有仙人闔聖

縱跡極多東女學山前有神鵬一窠常護洞門人或
侵犯者神鵬擊之立致殞斃古有道流刻五石人置
於山上民有鋤禾者爲鵬所驚走避於石人之下置
筮於石人頭上鵬即擊之石人頭殞于今見在
井下有洞有經卷可謂怪矣

形勝總記

漢黃憲

夫秦四塞之壤也雖偏鎮于西隅而國之形勢實爲
天下雄固帝霸之業也若夫盤互而秀于南者則終
南太乙焉崑崙乎陰于西極而東望潼關者則華嶽
焉東注咸陽則澧水之所導也其境有蘭池阿房之

宮咸陽之南周之鎬京也茫茫四陵南北相望秦宮
所營澧其鬱焉豈惟涇水之望陵哉西北臨乎關國
而奕奕者其梁山也網緼而蒼蒼內有離宮別館昆
明西陂輦道紆曲而相屬者秦之上林也鬱然起于
鄠之東南者有紫閣峰焉其周之靈臺廢也久矣橫
亘乎藍田者有秦嶺焉霸水之所出峽關之所鎮也
截于西域而嫫姚之所開者其玉門之關乎環于漢
陽而微茫者其烏鼠乎限於北漠之陲匈奴倚垣而
窺者此秦之長城紫塞也扞蔽乎朔方而胡笳戰馬
之所集者其賀蘭之山乎聲下龍門景入太華而浩

蕩者黃河也而瀑布之滌漾者則太白焉荆山峙于
河則大禹鑄鼎之墟也若夫太液曲江之池樂游細
柳之原驪山之溫泉新豐之粉社隴山之九坂長安
之章臺又有博望西郊芙蓉未央長樂建章甘泉之
宮不可勝數其近而羅列者皆鍾秀于雍州其遠而
環帶者皆隱耀于關中也

名山巖洞泉石古蹟卷之十三

